

東
華
續
錄

東華續錄

同治六十九

臣王先謙敬編

臣張式恭恭校

同治七年戊辰春正月庚戌朔元旦節停止筵宴○李鴻章奏道員吳毓蘭稟稱擒獲賴逆後仍派隊在河西搜捕逃匪上年十二月十二日零星馬賊均經官軍追獲惟霧雨迷離尙有敗匪向天長逃去李昭慶派道員余思樞等馳抵天長探詢賊股十餘人竄天邑之汭澗被鄉團擒殺淨盡另股二百餘人由來安之自來橋竄往盱眙津泥鎮十六日余思樞追及之督團兜擊殺賊多名又據提督李世忠稟稱前蒙撫臣英翰屢邀助辦勦撫今因賊被圍困恐其竄逃趕赴舊縣團防適敗賊由自來橋逃至內有僞衛王李允等跪求投誠查點擒黨約二百餘名當誑勸李允等隨該提

督由水路速赴大營立功自贖查逃匪既在皖境李世忠係英翰
屬令招撫李允等酋已解送潁州英翰當能相機辦理不至復爲
後患聞牛遂任三應皆在其內想英翰分別妥辦奏報在途此股
捻賊業經剿撫淨盡臣軍馬步各隊卽飭撤回原防休息至逆首
賴汶洸一犯准兩江督臣曾國藩咨稱已在揚州就地正法再賴
汶洸親筆供詞內稱任柱牛宏升張總恩李蘊汰等皆係捻首任
柱已在賴榆殲斃牛宏升卽牛洛紅上年經周盛波戰敗受傷而
斃牛遂卽牛洛紅之子李蘊汰卽偽衛王李允合併聲明 上諭
軍機大臣等李世忠雖係奉英翰屬令招撫惟李允等三犯流毒
數省生靈受害無數被剿後窮蹙無路始行投誠勢難再事姑容
著英翰卽將該三犯審訊明確就地盡法處治以快人心而申國
憲其餘投誠各犯亦宜分別情罪嚴行懲治不可稍從寬貸此外

有無零星逃匿餘匪並著英翰派兵嚴接淨盡以絕根株不得稍存大意河北擒匪見已竄至懷慶並有擾及衛輝之說勢甚剽疾李鴻章當懷遵前諭迅飭劉銘傳善慶溫德勒克西督率所部兵勇馬隊馳赴河北一帶迎頭截剿務期就地殄除毋任紛擾此股捻匪有宋憬詩餘黨在內尤恐其勾結東昌臨清等處教匪致滋蔓延李鴻章當豫籌防範並著另添兵勇親行督帶於黃河南岸擇要扼守以便就近調度程文炳一軍仍著英翰飭令剋期拔營馳赴北路探賊所向迎頭截剿逆首賴汶沈業經正法並著李鴻章傳檄河北直東一帶以塞張總愚股匪之膽仍應相機剿撫兼施冀孤賊勢以便迅速殄除前諭官文出省督防見想已赴大名廣平一帶扼要駐紮陳國瑞計到正定著卽分撥兵勇交令管帶迅往剿賊並迎提由直入豫各軍星速前進以厚兵力將此由六

百里各諭令知之○命吏部尙書朱鳳標協辦大學士○壬子諭軍機大臣等張之萬奏籌辦江北善後事宜英翰奏行抵壽州任事餘捻投誠見在辦理情形續派勁軍馳援河北各摺片捻逆餘匪竄近來安盱眙地界李世忠督團迎擊逆匪勢蹙投誠該提督恐其情急南竄裹脅又多將此股全數招降李世忠勇於任事力顧大局所籌甚合機宜惟李允任三應牛遂實爲著名悍賊斷難倖逃法網著英翰仍遵前旨訊明後盡法處治以快人心其餘投誠各犯並著察看情形妥籌辦理蒙亳一帶爲捻逆老巢見在零匪旣已按捕殆盡英翰當慎選牧令除莠安良以清盜源毋令萌蘖潛滋所有蹂躪地方尤宜加意拊循妥籌善後程文炳一軍英翰見飭由臨清鉅鹿一帶探明賊蹤相機迎擊並續派牛師韓方長華兩軍由汴梁馳赴河北作爲遊擊之師頗能不分畛域卽著

分檄各軍星馳前進一面咨照官文李鴻章李鶴年悉心會商相機調度江北土匪乘機竊發亟應嚴行搜捕著張之萬檄飭姚廣武等軍實力搜拏務絕根株所收降眾該漕督見擬資送回籍應如何妥爲安置之處著張之萬悉心辦理以免別滋事端將此由四百里各諭令知之○定浙江減兵增餉章程○癸丑諭軍機大臣等官文奏豫省匪蹤竄向東南見籌布置並請暫緩出省各摺片捻股麇聚衛懷各屬直省防務日緊且無知兵大員前往督勦各將士尤難用命官文仍當懷遵疊次諭旨相機出省馳赴大名廣平一帶扼要駐紮該署督素能任事諒不至有誤事機其唐訓方等軍卽著飭令前往妥籌布置余承恩一軍仍著遵奉前旨迅赴河北追剿如該員所部不敷並著官文另籌添撥該道員受恩深重正宜及時立功不得株守直境希圖安逸直省門戶固應嚴

防然賊氛既近亟宜分兵出境截剿不得盡疆自守任賊紛擾前有旨令李鴻章卽赴河南督軍迎剿著該大臣迅督諸軍入豫扼要兜擊劉銘傳善慶溫德勒克西各軍著該大臣仍遵前諭催令分路迅進毋任遷延山東曹鉅一帶爲捻逆往來熟路匪蹤見竄延津封邱等處難保不乘勢東趨著丁寶楨豫籌防守毋待逆氛迫近徒費周章程文炳一軍昨據英翰奏稱飭由臨清鉅鹿一帶前進並續派牛師韓方長華兩軍由汴梁馳赴河北著卽飭令星速前行以資剿擊李鶴年計已馳抵衛輝卽著就見有兵力督飭各將弁實力兜剿不可專恃援軍致賊勢日形延蔓陳國瑞已赴廣平惟所部無人不得不酌爲抽撥宋慶諒入豫境並著李鶴年派員催提與陳國瑞合併成軍至河北一帶合力迎剿官文亦當飭該侍衛迅速前赴毋稍逗畱官文另片奏請截畱餉銀先行動

用等語部庫餉需原不得任意截留所有湖南省前存直隸藩司庫內解京餉銀十七萬兩零如已動用著卽籌款歸補委解部庫其請飭部撥銀二三十萬並天津新關稅銀暨撥長蘆運司鹽斤復價一款已令戶部速議矣將此由五百里各諭令知之○乙卯諭軍機大臣等穆圖善奏定邊等處勦賊獲勝金順帶兵東勦等語賊匪攻撲定邊安邊甌井各城堡均經官軍擊敗雖受懲創尙未遠颺金順見在帶兵馳赴東路會勦著卽將定邊等處股匪迅速撲滅毋稍稽遲前有旨令金順挑選所部精騎並統率沿邊馬步各隊及胡世英各營剋期東征該署將軍見統各軍不下二十餘營兵力較厚自當遵奉前旨先將花馬池一帶董高二逆老巢攻克拔其根株再赴延安所屬督飭各營節節掃蕩以保晉甘門戶並著庫克吉泰喬松年劉典調派陝軍與金順聯絡會勦毋得

稍分畛域花馬池一帶距晉省包頭等處不遠裕瑞桂成尤須加
意防範毋令該匪闖入邊境張總愚股匪見已由懷慶竄至衛輝
所屬各邑左宗棠帶兵入晉見在行抵何處著卽迅速取道繞前
截剿毋任蔓延穆圖善另片奏正甯縣城被回匪攻陷寶雞回匪
退竄回巢等語著穆圖善速派兵勇將此兩股逆回實力埽除並
著庫克吉泰喬松年劉典派兵嚴防陝省邊境與甘軍會籌剿辦
毋任再行東竄將此由六百里諭知左宗棠庫克吉泰穆圖善裕
瑞喬松年金順桂成並傳諭劉典知之○廣湖北黃陂縣學額六
名四川鹽亭一名○予甘肅陣亡署訓導李蓬峯署典史彭覺祭
葬世職○丙辰英翰奏查李世忠所收降眾大頭目八人小頭目
三十五人李允牛遂均在其內任三應前在揚州已渡河淹斃李
允寶爲逆首該匪倡亂十餘年流毒數省自臣檢獲張落刑後元

惡雖除而該逆與任柱張總愚等結爲死黨奔竄於江淮東豫之間罪難擢髮此次奔入皖境雖於李世忠處俯首乞降實由牛遂與眾小頭目首先歸誠該逆見羣情已變始相隨就撫迹其罪大惡極本應卽行正法惟思該逆係蒙宿一帶著名巨首自應恭候諭旨飭下再將該逆明正典刑並傳首淮北等處以昭炯戒其牛遂一名雖係牛洛紅養子年僅十七歲從逆未久且係爲任李兩逆所脅此次首先投誠實爲真心悔罪李允之得以就獲者亦得牛遂等之力爲多擬將其暫畱軍前責令立功贖罪其餘降眾大小頭目四十餘人除任夸任罷亡等係任逆弟兄業經分別正法外餘均編伍歸營安插妥協斷不至再生事端李世忠辦理此事相機收撫不勞一軍卒獲渠首應如何優加賞賚之處出自鴻慈所有皖營尤爲出力將領謹繕清單隨摺保奏伏候恩施 上

諭內閣捻首偽衛王李允係著名巨捻曾受粵逆偽封與任柱張
總愚等逆分竄江蘇安徽山東河南等省到處肆行蹂躪此次逃
入皖境窮蹙詐降覈其罪狀擢髮難數自應立予顯戮以快人心
著英翰將該捻首李允卽行就地正法毋庸解京並傳首犯事地
方用昭炯戒其餘降眾均著妥爲安插以示朝廷威與維新至意
○諭前因安徽軍務未竣疊經諭令丁憂巡撫英翰毋庸開缺並
賞假一箇月治喪假滿作爲署任茲據英翰奏稱軍務肅清籲懇
扶柩回旗補行穿孝等語覓在東捻雖已蕩平而撫輯降眾撤軍
籌餉各事宜均關緊要著英翰將一切善後事務籌辦妥協再行
回旗補行穿孝英翰回旗後安徽巡撫著吳坤修署理○諭軍機
大臣等左宗棠奏吉林馬隊剿捻大勝英翰奏續派勁軍馳赴北
路趙長齡奏請飭余承恩統師入晉各摺片左宗棠所派喜昌等

各馬隊行抵河內縣屬之合村地方突遇捻騎圍撲喜昌等列隊迎擊槍礮環施計經一晝夜之久共斃悍賊一千餘名賊眾大潰實屬奮勇可嘉所有此次尤爲出力各員著左宗棠擇尤保獎河北賊蹤屬集必須大兵會剿方能痛埽逆氛左宗棠見因澤潞一帶積雪難行擬從平陽大道入山趨遼州由直隸順德一路前赴河北著卽探賊所向繞前壓剿劉松山郭寶昌業已馳至濟源卽著飭令該提督等會同喜昌等乘勝兜擊毋任該逆得以喘息副都統安住延不出隊殊屬乖謬著卽革職畱營以觀後效所有安住全福所帶馬隊著交喜昌統帶俾資得力前有旨令李鴻章催令劉銘傳善慶溫德勒克西迅赴河北該提督等諒已登程仍著遵旨檄催分路前行不准稍有延緩李鴻章亦當迅督各軍前赴河南相機調度英翰見改派陸鴻慶等隨同牛師韓前赴河北隨

地遊擊騰出方長華一軍仍由河北馳赴直豫所籌尙妥著卽分飭該將弁等剋期前進其程文炳一軍亦卽檄令由臨清鉅鹿一路趨行以便會合諸軍奮力勦擊李鶴年計已馳抵衛輝何以數日來未見奏報著該撫迅將近日常軍情賊情詳細奏聞並著督飭各軍乘勝兜擊以期就地殄除趙長齡奏晉省見無賊蹤與臬司陳湜分籌防堵並調余承恩赴晉余承恩一軍見在直境勦賊毋庸調派前往俟各援軍到直後再候諭旨遵行西路河防仍形緊急著趙長齡傳知陳湜嚴密防守如再有一賊渡河致晉西復遭蹂躪卽將該臬司軍法從事該撫等具有天良諒不至仍前玩泄增朝廷西顧之憂正在寄諭間據官文奏稱前敵各軍迎勦情形並賊蹤擾及開州暨張曜宋慶兩軍已抵封邱各摺片捻逆由臨漳等處分股渡河經同知余沛恩等會督兵勇迎勦獲勝其由內

黃過河之賊見已擾及開州之井店地方直省軍情甚屬喫緊著
官文懍遵前諭剋期馳赴大名廣平一帶相機扼紮並嚴飭唐訓
方等各帶所部趕緊分布毋稍疏虞春壽富和所帶馬隊尙稱得
力並著該署督令其合隊迎剿毋庸另行分撥致形單薄駐紮南
苑之黑龍江馬隊一千名著神機營飭赴直隸交春壽統帶並歸
官文調遣以厚兵力張曜宋慶兩軍已抵封邱卽著官文李鶴年
等檄令張曜等繞出賊前與直隸各軍合力痛加剿洗以遏北犯
陳國瑞已由廣平進發著卽會合張曜宋慶兩軍實力進剿如張
曜等軍一時未能會合或先與春壽所統馬隊會齊以便相機截
擊賊蹤逼近畿疆李鴻章英翰務當嚴飭劉銘傳程文炳各軍並
善慶溫德勒克西等馬隊兼程前來如有遲延玩誤等情惟李鴻
章等是問丁寶楨前奏正月初旬親赴東昌相機辦理見在賊蹤

北竄該撫計早出省著卽迅派勁軍赴大廣一帶迎頭截擊其吉林黑龍江丹丁馬隊如已訓練齊集亦卽派赴直隸交春壽統帶該副都統久經行陣帶隊素稱得力著官文傳諭該副都統會合各軍步隊實力迎剿官文所調洋槍礮隊及津軍馬步練兵卽著崇厚遴選得力員弁管帶啟程交官文調遣以資厚集津郡一帶亦宜豫防著崇厚挑派得力之兵嚴密布置庶免臨時周章將此諭知神機營並由六百里各諭令知之○諭英翰奏提解捻首到營分別安插降眾一摺牛遂一犯旣據英翰奏稱從逆未久首先投誠情稍可原著免其一死仍著英翰將該犯嚴加管束如敢滋生事端立即正法毋稍姑容其存畱降眾尤當設法箝制免致反側以弭後患任三應卽任三厭據稱於揚州渡河時淹斃是否確鑿著李鴻章張之萬英翰確切查明毋令倖逃顯戮將此由五百

里各諭令知之○諭王通奏西甯府屬漢回互關北川失陷一摺
此次北川新城地方被十三莊回匪攻陷又復勾結撒拉回眾焚
掠威遠堡附近漢莊情形甚爲猖獗王通因兵力不厚暫且辦撫
而西甯郡城並無道府大員駐紮王通遇事無所咨商著穆圖善
迅催蔣凝學前赴西甯與王通隨時商酌以期有濟其新降回日
馬朝清並著穆圖善催令前往毋稍遲緩將此由五百里各諭令
知之○諭李雲麟奏患病未痊懇請開缺並舉員自代一摺已賞
給錫綸頭等侍衛作爲布倫托海幫辦大臣矣惟錫綸雖熟悉北
路情形而閱歷較淺恐未能措置合宜此時畀以幫辦之任藉資
造就李雲麟毋庸開缺仍當會同明瑤錫綸遇事和衷商辦以期
有濟布倫托海新設辦事大臣本係李雲麟勦議乃事當開辦之
始卽諉之他人揆之人臣事君之道豈宜如此著卽仍遵前旨力

疾從公督率棍噶札勒參將所籌各事宜妥爲經理以副朝廷終始保全之意將此由五百里諭令知之○賞刑部郎中錫綸頭等侍衛爲布倫托海幫辦大臣○以安徽官軍扼守運河疊次勦賊出力賞提督李世忠福字珍物總兵官張得勝雲騎尉世職提督黃秉鈞等升敘開復有差○丁巳諭軍機大臣等昨據官文奏稱賊竄開州所屬井店地方曾諭令官文迅卽馳赴省南並令李鴻章等催提各軍迎頭截擊見聞捻逆分三股希圖肆擾牽掣兵力而直豫兵勇不多宋慶等軍未能遵旨前進致落賊後劉松山等軍遠在濟源河北爲完善之區儻任賊飽掠裹脅必致逆倭愈張且與畿輔路路可通設被闖入李鴻章等豈能坐視前諭李鴻章催令劉銘傳等軍由直隸迎勦至今並未覆奏李鶴年出省後勦辦情形亦無一字奏報殊可駭異著李鴻章迅催劉銘傳善慶溫

德勒克西等軍兼程前進探明賊蹤所向分投迎剿並著李鶴年
催張曜宋慶兩軍繞出賊前迅圖殲滅程文炳一軍近日行抵何
處著官文英翰分別提催此次捻逆由晉竄豫所調各軍若能迅
速前來迎頭痛剿河朔三郡何至徧遭蹂躪軍行遲玩殊堪痛恨
本當嚴加懲處念其曾著勞績暫緩譴責若再任意遷延必將該
將弁等嚴辦以肅軍律左宗棠亦當趲程前赴順德總統諸軍向
南壓剿並催劉松山等軍繞出賊前毋再遲延李鴻章何日啟程
著卽迅速馳奏匪蹤擾及畿南該大臣如由山東徑趨直境督率
所調各軍自北而南節節進剿較爲得勢並著相機辦理官文計
已出省當激勵諸軍分投堵剿斷不可稍有姑息貽誤大局儻將
弁中有巧猾延玩者卽奏明以軍法從事如該署督有心隱諱經
朝廷別有訪聞則責有攸歸恐不能當此重咎也將此由六百里

加緊各諭令知之○諭左宗棠奏涇州解圍攻克鄧家堡等處一摺譚玉龍等軍攻拔窰店鎮回巢後旋將裊裊山土匪殲斃涇州得以解圍該匪雖經擊敗難保不再圖窺伺著庫克吉泰喬松年劉典檄飭譚玉龍黃鼎兩軍分駐邠州瓦雲驛窰店鎮等處嚴密布置務將該匪節節掃蕩迅就殄除雷正綰一軍進攻鄧家堡等處疊有斬擒慶陽道路已通該郡爲運糧要道並著嚴檄雷正綰統率所部轉戰而前直搗堅巢毋令慶陽再被匪圍致糧道復行梗阻庫克吉泰等仍當與左宗棠隨時咨商將一切機宜會籌辦理將此由五百里諭知左宗棠庫克吉泰喬松年並傳諭劉典知之○戊午諭軍機大臣等據官文馳奏賊勢北趨請飛調客兵入直各摺片崇厚奏派撥洋槍隊等軍助剿一摺覽奏曷勝憤懣張總愚等股匪前由陝省渡河入晉時卽經諭令李鴻章李鶴年英

翰飭令張曜宋慶並劉銘傳程文炳等軍迅速渡河分由直隸迎頭截擊疊經嚴諭催提昨因捻由河北竄近直境復經諭令官文李鶴年催提張曜宋慶兩軍繞出賊前會合直軍痛剿乃各路統兵大臣並各該省撫臣膜視玩延並不實力催提星夜前進以致處處落後任令賊由臨漳內黃竄過漳河邊馬擾及順德所屬大股由東北平鄉雞澤南和等境狂竄直向北趨李鴻章等各擁重兵坐視觀望毫無急難之意是誠何心捻股裹脅日眾畿輔東北一路兵力未厚設因客兵未齊蔓延益甚震及近畿一帶尙復成何事體見在軍情萬分喫緊張曜宋慶兩軍已行抵封邱李鶴年自當先其所急飛檄該總兵等不分晝夜兼程統軍入直繞前截剿並著李鴻章親督所部各營由臨清德州一帶剋日馳赴直境相機截剿不得稍遲片刻劉銘傳善慶溫德勒克西等軍剿平東

捻爲日已多將士早可休息並不趕緊前進皆李鴻章督催不嚴之咎著該大臣限日飭令迅赴直境迎頭截剿左宗棠見在行抵何處劉松山郭寶昌兩軍於初三日馳過漳河追剿尙屬出力仍著官文左宗棠飛速催提繞前迎擊總期將賊逼出直境爲要並著官文先就直省見有兵力飭令春壽陳國瑞等軍實力迎剿左宗棠跟追入直會合夾擊以顧大局崇厚見派洋槍隊並天津練軍共二千名出剿著卽飭令卽日馳赴官文行營歸該署督調遣以厚兵力李鴻章催提劉銘傳等軍不力並接奉諭旨後迄無一字覆奏李鶴年於宋慶張曜兩軍並不遵旨飭令分途前進致匪蹤乘虛北竄李鴻章李鶴年均著先行交部嚴加議處以示薄懲儻再遷延膜視定當重治其罪官文出省督剿遲延姑從寬免其議處嗣後如再似此因循自當一併嚴懲各該統將等如再遲延

誤事必當治以軍法以肅紀律毋謂朝廷言之不早也官文請調黑龍江馬隊著神機營飭令立即拔隊馳赴直隸仍遵前旨歸官文調遣所需車輛糧米及馬匹草豆均著官文王榕吉飭屬剋日辦齊其由京至保定一路並著王榕吉親行護送該馬隊行走以便沿途支應不誤軍需官文所請飭派神機營迅撥勁旅之處著該王大臣妥爲籌畫山西毗連直隸隘口甚多趙長齡當速行派兵嚴密堵遏以防回竄程文炳一軍雖距直較遠英翰仍當嚴催星夜馳抵直境並著飭令方長華一併入直儻不趨行前進卽當以軍法從事不可稍涉寬縱丁寶楨當已督軍馳赴東昌著卽遵照前日諭旨分撥兵勇出境兜剿不得畫疆自守其畱駐東省黃河沿岸之吉林黑龍江丹丁計已訓練齊集並著懷遵前諭飭令迅赴直隸交春壽帶領統歸官文調遣津郡一帶防剿事宜仍著

崇厚豫籌布置不可略形疏懈正在寄諭間據李鶴年奏稱匪股由懷慶東竄一摺所陳接仗調兵各節尙係賊未入直情形見在逆蹤已擾及畿南張曜等追軍亦經渡過黃河著李鶴年飭令就近繞至賊前向南壓剿不得專顧本境致誤大局陳國瑞俟張曜宋慶入直後卽著官文飭令會合兩軍實力剿賊將此諭知神機營王榕吉並由六百里加緊各諭令知之○命趙長齡等酌撥哈密軍餉○己未以孟春時享太廟上前期親詣行禮○命酌撥淮浙福建鹽茶等稅備內務府本年經費○庚申諭軍機大臣等昨據官文奏稱捻逆竄至平鄉雞澤南和等處勢漸北趨所調援軍尙未趕到恐其分竄肆擾震及近畿宣化練軍前已撤回著官文酌量情形調赴保定附近一帶駐紮並著鄭魁士於古北口遵化各練軍內挑選精銳二千名督帶馳赴保定以南扼要截剿

以杜紛擾密雲練軍已逾半年其中諒有可用之兵著定安據實具奏以備調遣劉銘傳一軍昨已諭令李鴻章迅催赴直繞前迎擊卽著官文飛提該提督由河間一帶剋期進剿毋得敘落賊後又費周章程文炳於上月二十六日由宿遷拔隊北行迄今已近半月計早馳抵東境並著官文嚴催由德州河間大路前進迎賊所向奮力截剿毋稍片刻延緩將此由六百里諭知官文定安並傳諭鄭魁士知之○諭崇實奏官軍攻剿滇匪鹽源解圍克復鹽井一摺滇匪攻陷鹽井直撲鹽源縣城經劉寶國等帶兵進剿立解城圍並將鹽井克復川邊肅清劉寶國帶傷力戰奮勇可嘉所有在事出力員弁兵勇鄉團著崇實擇尤彙案保奏毋許冒濫建南與迤西壤地毗連難保滇匪不復萌窺伺仍著崇實督飭該地方文武嚴密防維毋稍大意將此由五百里諭令知之○辛酉諭

內閣前因捻逆竄擾直隸平鄉等境李鴻章等未能催提劉銘傳等軍迅速赴援降旨將李鴻章李鶴年先行交部嚴加議處本日據官文崇厚奏捻匪北竄衡水定州一帶丁寶楨奏帶兵出省豫籌北援等語覽奏曷勝憤懣朝廷特命官文署理直隸總督剿匪是其專責乃毫無布置任令捻逆北趨日肆蔓延實屬有負委任左宗棠於張總愚捻股未能在陝省就地殲除致令紛竄山西河南擾及畿輔調度無方官文左宗棠均著交部嚴加議處李鴻章身任欽差大臣爲朝廷素所倚畀當此匪蹤北擾宜如何速派援軍同心剿賊乃疊奉諭旨既未催令劉銘傳暨善慶溫德勒克西等軍趨程前進又日久迄無一字覆奏是何居心著拔去雙眼花翎並褫去黃馬褂革去騎都尉世職李鶴年未能迅速出省督剿會殄逆氛以致捻匪竄入直境擾及近畿所謂宋慶等援軍又不

遵旨飭令分途前進貽誤戎機著革去頭品頂帶並摘去頂帶劉銘傳暨善慶溫德勒克西各軍是否李鴻章於接奉諭旨後未經催令啟程抑係該員等任意逗畱宋慶張曜先後寄諭李鴻章李鶴年飭令繞赴直境迎頭壓剿乃均由豫省渡河致落賊後是否該員等不聽調度抑係李鴻章李鶴年不遵諭旨令其改道赴豫著李鴻章李鶴年據實覆奏再行分別懲處除丁寶楨帶兵入直諭令迅速前進外所有前調劉銘傳等軍仍著官文等迅速催提以資兜剿尋吏部議奏官文左宗棠革職得旨均加恩仍著革職畱任○諭軍機大臣等神機營王大臣奏遵撥馬隊赴直並豫備馬步官兵聽候調遣請飭各路統兵大臣懸賞擒斬逆首官文奏捻逆擾及定州請飭嚴防北路崇厚奏北路空虛請飭李鴻章等統兵北援並續奏派兵扼紮河間迎剿李鶴年奏張曜等軍剿賊

獲勝並請飭直隸等處勦辦堅壁清野丁寶楨奏出省布置並豫籌北援各摺片覽奏曷勝憤懣此次捻逆由晉入豫左宗棠李鶴年既不能遏賊於前迫竄入直境官文漫無布置李鴻章等又未能遵旨調兵北援致令捻蹤闖入定州勢等燎原實堪痛恨見在定州既有賊蹤勢必愈趨愈北亟宜重兵扼紮著神機營王大臣迅將所備馬步官兵交玉亮統帶前進視賊所向扼要截剿昨日調赴保定之黑龍江馬隊一千名並著由涿州相機前進暫在易州駐紮毋庸前赴省南並著官文派委府道大員前往照料以便王榕吉交替回京春壽富和所帶馬隊著一併調赴保定以北官文不得截畱春壽等馳抵保定後卽著官文傳諭該副都統規賊所在迎頭痛擊陳國瑞如已會合春壽等隊亦著一併北來如易州情形較緩所有神機營派出之黑龍江馬隊統歸春壽管帶以

厚兵力並著官文迅催余承恩等軍繞前截擊毋得稍延片刻該將弁等如有稽延觀望情事卽行從嚴參辦崇厚見調槍隊練軍二千名並添調槍礮各隊三營交陳濟清統領赴河間迎剿深合機宜惟陳濟清向來剿賊不能奮勇著該侍郎嚴飭該總兵兼程前進遇賊奮剿張曜宋慶兩軍節節落後著李鶴年催令繞出賊前如再遲延玩誤必當重治其罪所有河北出力將弁著李鶴年暫行存記俟捻逆肅清後再行保獎丁寶楨擬親督募組紳等軍馳赴任邱雄縣等處迎剿洵屬勇往可嘉卽著剋期啟程馳赴直境北路繞出賊前合力痛剿左宗棠見在行抵何處喜昌劉松山郭寶昌馬步各軍卽著催赴北路毋得徒事尾追該大臣亦卽兼程赴直督同勦辦不得再涉遲延昨令定安挑選密雲練軍備調鄭魁士挑選古北口遵化練軍二千名馳赴畿南督剿見在賊情

愈急定安著酌帶密雲駐防所練之軍順道迅速來京聽候調遣
鄭魁士仍遵前旨督帶前赴保定以南聽候官文調遣 西陵重
地最關緊要著奕梁裕恪衍秀嚴密防範惟該處存兵不多並著
責成官文派兵扼堵儻有捻蹤竄近惟官文等是問前因王家璧
奏請招撫脅從曾令各路統兵大臣曉諭並由軍機處繕給滿蒙
漢字告示諒已刊刻懸挂矣著官文李鴻章左宗棠崇厚李鶴年
丁寶楨再行出示曉諭如有擒斬逆首張總愚者無論官員軍民
均照從前擒斬任柱之例賞給銀兩或酌予官職其陷於賊中能
將該逆首斬縛自拔來歸者除免罪外仍著優加賞賚以孤賊勢
並著官文飭屬辦理堅壁清野毋使賊有所掠其順天所屬各州
縣著官文萬青藜王榕吉會同辦理斷不可有名無實貽誤事機
英翰前調程文炳各軍至今尙未見到著卽催令前進並著官文

迎提如程文炳等有意遷延卽著官文嚴參懲處賊至定州距山西大同屬邑不遠著趙長齡豫籌布置將此諭知神機營順天府並由六百里加緊諭知官文李鴻章左宗棠崇厚丁寶楨李鶴年英翰趙長齡奕梁裕恪衍秀定安並傳諭鄭魁士知之○湖南巡撫劉崐奏援黔各軍分勦苗教等匪獲勝得旨著卽嚴密布置並著席寶田迅督所部馳赴石阡將荆竹園教匪合力殲除○予湖南陣亡副將席啟庚等祭葬世職○壬戌諭內閣本日據官文馳奏捻股竄至清苑境內各路官軍齊集見籌勦辦一摺捻匪由定州竄向清苑行蹤飄忽經提督劉松山總兵郭寶昌協領喜昌各統所部兵勇不分晝夜繞越賊前趕赴保定省城侍衛陳國瑞亦催令張曜宋慶各軍陸續趕到副都統春壽所部馬隊各軍屈計亦可繞越賊前見在各路大兵雲集聲勢甚壯不難將該捻剋日

殲除著官文乘此聲威督飭各軍實力痛勦速殄逆氛毋任旁竄
追賊各將尙屬出力劉松山等軍由陝豫追至直隸星夜兼程繞
越保定尤屬奮勉可嘉劉松山郭寶昌喜昌均著先行交部從優
議敘○諭軍機大臣等本日據官文馳奏逆匪竄至清苑催軍繞
截並喜昌等軍繞至賊前及隆平勦賊各摺片逆匪於初十日夜
間由定州直撲清苑省城戒嚴喜昌劉松山郭寶昌各軍已經趕
到該將士等星夜兼程馳赴近畿應援深慰朝廷期望實屬奮勇
可嘉陳國瑞亦於是日帶隊趕至保定並催宋慶張曜兩軍於次
日到省均屬奮勇春壽余承恩等軍由高陽繞路前赴保定此
當亦可到官文計已督軍出城迎頭會勦總期由北面進壓偏
南趨節節痛勦是爲至要本日據神機營王大臣奏派兵分路防
禦情形所有派出馬步軍二千七百餘員名著卽馳赴涿州一帶

酌量情形防剿其餘二千一百餘員名卽前赴雄縣霸州一帶防
剿其備調之黑龍江馬隊四百名卽著趕緊補齊馬匹相機調撥
逆騎剽疾異常難保不由保定橫向東趨繞赴北路涿雄等處兵
力未厚官文當慎爲畱意隨時相機飭令保定諸軍力固西北毋
稍疏忽致誤全局崇厚前派之天津洋槍練軍共二千名並著速
飭馳赴河間等處與神機營所派防軍聯絡聲勢以固京南一路
鄭魁士一軍著由附京東北趨向西南迎頭截剿丁寶楨昨擬帶
莫組紳等軍北援如兵勢尙單著卽添派得力之隊星夜趕赴北
路迎頭堵截並著速飭吉林黑龍江丹丁一併北來以厚兵力山
東臨德東昌河防仍著嚴密堵遏毋令賊騎竄渡山西界連直隸
各山口要隘趙長齡當懷遵前諭派撥兵勇堵截毋任賊蹤竄越
晉疆易州重地關繫非輕著官文懷遵昨日諭旨密籌布置如有

一賊竄向西北惟官文是問近畿情形如此緊急李鴻章當懷遵
疊次諭旨督率所部迅速入直並飛催劉銘傳善慶溫德勒克西
等軍北來會剿淨掃賊氛河北一帶李鶴年亦當速籌兵勇嚴密
堵禦以防賊蹤回竄牛師韓一軍著英翰嚴催入直程文炳如遷
延不行北上著官文英翰速行嚴參治罪左宗棠見在行抵何處
何以數日並無報來該大臣縱賊入直若再不趕緊繞出賊前自
問當得何罪耶將此諭知神機營並由六百里加緊諭知官文李
鴻章左宗棠英翰丁寶楨李鶴年趙長齡崇厚並傳諭鄭魁士知
之○諭景紋奏襄塘案內各犯均已押解至藏並達賴喇嘛等公
同具結懇請將東登工布一犯從寬辦理一摺東登工布係工布
朗結之子覈其情罪本難寬宥惟據該達賴喇嘛暨藏屬僧俗人
等結稱東登工布當藏兵進攻之時屢勸工布朗結退出所占地

勦以上各軍如距陳國瑞營較近卽著陳國瑞迅速傳諭以免紆
折阻滯崇厚派出之軍毋庸駐守河間卽著催令兼程由固安附
近一帶相機進勦丁寶楨亦著由河間雄縣趨捷徑迅附固安附
近一帶繞前兜勦不可稍涉遷延鄭魁士所帶之軍卽著改道由
密雲順義一帶迅速進發以上各該軍進止機宜並勦賊情事均
著一面互相知照一面徑報神機營 西陵亟宜防範著奕梁裕
恪衍秀妥爲防守其神機派出前赴易州之馬步隊著奕梁等派
員迎提會同駐紮並著多張旗幟以壯聲勢毋使逆蹤逼近官文
卽著出省調度一切遵奉諭旨相機辦理將此由六百里加緊諭
知官文丁寶楨崇厚奕梁裕恪衍秀並傳諭鄭魁士劉松山郭寶
昌陳國瑞知之○諭見在捻股已近易州西北一帶情形喫緊著
王榕吉會同景瑞統帶黑龍江馬隊卽行馳赴涑水易州一帶扼

要堵剿不得中途逗留致有貽誤賊蹤已竄過保定以北官文何得安坐省城任賊紛竄著卽趕緊出省繞赴西北一路統率諸軍相機截擊以保 陵寢重地兼顧畿甸省城應辦防守事宜著交鍾秀妥爲籌辦毋稍大意將此由六百里加緊各諭令知之○諭前日據神機營王大臣奏派兵分路防剿情形當經諭令將派出馬步各軍馳赴涿州雄縣等處防剿昨因易州地關緊要復諭令該王大臣添派隊伍速赴該處助防見在捻蹤竄近易州情形更爲喫緊京城西北一帶亦須派兵扼紮著該王大臣迅速揀派得力兵勇妥爲布置並分路廣設偵探毋稍疏漏延緩將此諭令知之○李鴻章奏臣疊奉諭旨飭催劉銘傳善慶溫德勒克西馬步各營迅赴河北進剿臣查劉銘傳一軍自同治四年春間奉調北征馳逐數省迄未稍休臘月下旬劉銘傳自清江追賊回營函稱

積勞成病不能乘騎諄請開缺或乞假三箇月暫予調養等情臣
派員前往看視患病屬實因屬臣弟李昭慶順道勸慰令其乘舟
來濟面商一切到濟後臣與朝夕聚會察其精神雖尙可支惟骸
疾增劇萬難騎馬肝氣上衝動輒憤怒蓋由秉性忠勇追賊三年
之久艱苦備嘗心力交瘁臣旣懷聖訓催督之嚴又憐該提督
積勞致病之苦合無仰懇聖恩暫予賞假調養俟劉銘傳病體
稍痊臣卽催令督隊北行至善慶所部由河南帶來七百餘名加
以僧格林沁舊部馬隊三百餘名均係吉林黑龍江官兵出征十
數年疲病思歸久無關志溫德勒克西所帶察哈爾馬隊三百餘
名亦甚疲乏東捻告平善慶等卽稟請裁撤今聞調赴直隸該副
都統等深明大義已調取隊伍整頓鞍馬剋期北行惟所部太單
又極疲憊不能獨當一路與淮軍步隊保護旣久親若弟兄若益

以勁騎輔以臣軍或可爲國家捍禦疆圉也頃探賊已北趨邯鄲一路臣查直豫交界地勢平坦賊騎馳騁必速畿南各屬向少寨堡猝被寇警蹂躪何堪臣軍已成強弩之末整頓實需時日惟畿疆警報疊至必當提師赴援臣卽檄調總兵周盛波周盛傳等馬步十一營由徐州韓莊拔隊來濟會合藩司潘鼎新鼎宇全軍及善慶溫德勒克西馬隊陸續進發渡黃後視何路有警卽向何路截剿臣趕緊布置後路轉運糧餉軍火各事並催提督郭松林楊鼎勳大隊隨後繼進一俟部署稍定卽行啟程北上督率趨行察看賊蹤地勢擇要駐紮妥商調度左宗棠奏臣擬由大道赴太谷後取道遼州以達直隸沙河正月初八日抵靈石韓侯嶺途次遇雪初九日冒雪行八十里抵介休縣查遼州山徑凍滑萬難迅速趨行且臣全軍輜重僅飭山西州縣代雇車輛按站照價給錢衝

遂州縣臨時覓雇尙不免遲誤行期雪後深入荒山更恐夫羸缺
誤徑路艱阻求速轉遲見擬改道出井陘由獲鹿樂城柏鄉馳赴
順德一帶相機督勦頃據副都統喜昌稟報已與劉松山郭寶昌
兩軍馳抵河南新鄉縣探悉捻逆前股擾至衛輝城西後股尙踞
李家村計我軍追及該逆必有戰事已飭各軍跟蹤痛勦期與豫
軍共收夾擊之效臣慮豫軍與臣軍東西並集賊或覓徑回竄晉
省南路當飭山西按察使陳湜撥兵增南路之防並咨趙長齡嚴
密防堵臣又續調提督劉效忠馬步五營由豫境馳渡黃河扼垣
曲封門口一帶俾追軍一意前進可無後顧之虞 上諭本日據
衍秀奏並神機營探稱該逆大股於十三日已刻竄至距易州城
外三十里地方是賊蹤已向西北奔竄何以官文奏稱大股賊匪
尙盤踞保定距省城二三十里之涇陽驛恐所探未能確實著官

文仍遵本日寄諭迅卽出省馳赴易涿一帶調度劉松山郭寶昌張曜宋慶陳國瑞等軍迎頭截擊倭賊南趨並一面知照李鴻章如賊有南竄消息卽著迎頭痛剿以期卽時殄滅丁寶楨仍遵本日諭旨馳赴近京一路合力迎擊劉銘傳雖係患病而受恩至重當此烽火逼近易涿豈可稍涉遷延著俟病體略愈卽行督隊北上李鴻章已調周盛波等軍由東阿渡黃該大臣向來辦事尙屬勇往卽著兼程前進馳赴近京一帶督飭各軍相機剿擊並催提郭松林等隨後繼進善慶溫德勒克西馬隊從軍已久朝廷亦深知其勞苦俟畿輔肅清卽由該大臣奏請就近凱撤以資休息該大臣行糧必須豫爲籌備著官文嚴飭各州縣豫提公款趕購糧草麪料各十萬斤儲備公所俟李鴻章兵過卽給價取用並仍照數買補屆時如有缺誤卽著李鴻章嚴參所有轉運嚮導各事宜

卽責成張樹聲辦理並著於天津倉內借撥粳米三萬石飭令張樹聲派委員弁分運河間等處儲存以備軍食將來由李鴻章咨明江蘇巡撫照數籌運歸補左宗棠縱賊東竄雖追剿尙力而擾及近畿豈可不思補救著卽取道固關兼程前赴保定以期妥爲督剿以贖前愆毋再遲誤將此由六百里加緊各諭令知之○諭李鶴年奏馳抵彰郡卽日進紮磁州並飭軍力願北路暨張曜劫營獲勝各摺片所陳張曜等接仗情形尙在捻股未至保定以前見在賊蹤擾及易州安肅近畿軍情萬緊張曜宋慶兩軍已於十三日據官文奏稱由陳國瑞催提次日可抵保定並經諭令官文督飭各軍由北面進壓偏賊南趨矣仍著李鶴年飛飭該提督等繞出賊前會合直境各軍實力剿擊不可存主客之見稍涉遲延該撫見擬出境進紮磁州卽著扼要駐紮以防回竄並遙爲保定

聲援其馬德昭等軍著卽迅速催調以資厚集將此由六百里諭令知之○諭崇實奏統籌川黔防務請畱周達武暫緩赴任宋延春奏迤西勦匪情形並請催督撫赴任各摺片前因貴陽軍務喫緊諭令周達武迅赴貴州提督之任茲據崇實奏稱見已抽募兵勇派知府唐炯統帶由綦南出境援勦並派道員劉嶽曙等分路援應而蜀北邊防亦亟宜豫籌自是實在情形貴州提督周達武著准其暫緩赴任仍令統帶所分布川北以固蜀省門戶黔省既有川兵赴援著曾璧光振刷精神力圖進勦不得藉口兵單並著劉嶽昭懷遵疊次諭旨將龍里貴定各匪迅速掃蕩見在迤西軍務喫緊劉嶽昭著俟黔省蕝事卽赴雲南新任張凱嵩計假期將滿並著迅赴新任毋稍遲延宋延春當慎固封守籌掃逆氛毋得專待張凱嵩等到任致滋貽誤將此由六百里諭知崇實張凱

嵩劉嶽昭曾璧光並傳諭宋延春知之○命嚴查五城匿匪○命
恭親王會同神機營王大臣辦理巡防事宜○乙丑諭軍機大臣
等奕梁等奏詢明兵勇與賊相誤請暫畱喜昌防守崇厚奏匪竄
安肅見籌迎勦請飭鄭魁士駐紮通州各摺片據奕梁等稱易州
未見有賊十二日姚村鎮所見邊馬係官軍所發差探商民誤以
爲賊並省北見無賊匪屯集等語易州雖無賊蹤而該逆剽疾異
常不可不豫爲之備仍著官文與奕梁裕恪衍秀悉心會商嚴密
布置以期有備無患見在神機營派撥馬步官兵二千餘名令玉
亮等統帶前赴易州防守卽著奕梁等飭令擇要駐紮遇賊卽擊
毋稍疏虞易州防兵見已不少喜昌陳國瑞兩軍自應作爲遊擊
之師以利攻勦著官文等檄飭喜昌陳國瑞統率所部會合劉松
山郭寶昌等軍規賊所向痛殲醜類崇厚卽飭陳濟清馳赴東北

一路會同東省官軍聯絡聲援迅籌掃蕩鄭魁士所部著官文崇厚催令該署提督駐紮通州以顧京師東路劉松山郭寶昌喜昌宋慶張曜各軍跋涉遠來糧餉易形缺乏尤應加意拊循著官文寬籌餉項發給沿途州縣購辦糧草麪料隨時支應以便源源接濟儻該州縣供應缺誤並有侵漁情弊卽著官文嚴參治罪官文當傳諭劉松山等令其倍加奮勉會合諸軍將該逆迅行殄滅用副委任將此由六百里加緊各諭令知之○諭本日據伯彥訥謨祜奏懇准督兵剿賊穆騰阿奏請帶兵馳赴涿易一帶迎擊各摺覽奏均堪嘉尙見在捻逆麤聚滿城等處各路征兵雲集神機營派出馬步各隊亦足以資防守並經諭令官文等迅督諸軍分路迎剿惟京師重地防守尤關緊要如近城一帶分兵布置扼要安營各事宜均須有人督率統領著神機營王大臣傳知伯彥訥謨

祐候旨簡派穆騰阿本在神機營當差嗣後如有應行調遣之處再由該王大臣等奏派前往此時均毋庸帶兵出京將此諭令知之○丙寅諭軍機大臣等昨因神機營已派馬步官兵令玉亮景瑞等帶赴易州防守當經諭令奕梁等飭令擇要駐紮惟思該副都統等於該處地勢不甚熟悉易州一帶山徑紛歧必須履勘分明布置方有把握著奕梁裕恪衍秀挑派誠實可靠土人作爲嚮導帶領玉亮等將易州附近各處所周歷查勘山僻小徑有通陵內之處均須詳細查明其由易州以西通紫荊關要路亦應知其險隘庶防範可期周密奕梁等卽傳知玉亮分飭各隊統領隨同土人到處周查毋稍疏忽其守護陵寢兵丁著奕梁等飭令小心防護不准片刻疏懈賊蹤相距非遙務須隨時偵探以免疏虞玉亮景瑞等所帶馬步各隊足資防守著奕梁等仍遵昨日諭

旨檄飭喜昌陳國瑞統帶所部會合劉松山等軍剿賊毋得專意
株守致誤戎機將此由六百里各諭令知之○諭昨據奕梁等奏
稱賊蹤竄至滿城江城大江店一帶當經諭令官文檄飭喜昌陳
國瑞會合劉松山等軍迎剿見在賊蹤是否仍在滿城地方盤踞
抑或分股竄向他處涇陽驛是否尚有賊匪其竄踞滿城之賊是
否卽涇陽驛全股抑係另有分股近日官軍曾否與賊接仗剿辦
情形如何朝廷廑繫殊深官文於前日奏報情形後見無續報到
京著該署督將見在情形迅速馳奏並著隨時馳報以慰懸繫賊
情詭譎異常恐其畱住後股牽綴官軍而另分全股暗竄他處以
圖肆擾或由滿城以西山內暗圖繞越官文當慎選精細可靠兵
役嚴定賞罰勤加偵探密爲布置並著督飭各軍痛加剿擊迅挫
賊氛毋任日滋蔓延陝豫東皖各軍於直境地勢不能熟悉況滿

城以西山徑紛歧非得土人嚮導不能周知地利著官文迅速飭各州縣暨各軍將領無論官軍行抵何處卽著該地方官選派誠實可靠土人作爲嚮導以利攻剿昨據崇厚奏賊蹤竄至安肅是否確實著官文迅速查明馳奏正在寄諭間據丁寶楨馳奏督軍行抵任邱十六日可至雄縣丁寶楨一軍北上迅速奮勇可嘉見在賊股尙在滿城著該撫卽由雄縣橫向安肅保定一帶會合進剿並著崇厚飭令前派河間等處防軍聯絡聲勢探賊所向迎頭截擊總期偏由東北偏向西南以期屏蔽京畿是爲至要東軍由德州馳赴雄縣僅裹五日行糧見在缺乏可虞著官文崇厚趕緊籌款派員撥解銀米星馳該撫行營接濟其喜昌劉松山郭寶昌張曜宋慶等軍官文當仍遵前旨一體接濟毋任缺乏丁寶楨另片奏請入京陛見等語該撫由東省馳赴直北朝廷已深鑒其誠惟

見在軍情緊急該撫當在營調度督勦俟直隸軍務完竣後再行
來京將此由六百里各諭令知之○諭官文奏賊向東南竄動祁
州安平已見邊馬並豫軍等請獎各摺片覽奏稍紓屢懷張曜等
軍北援迅速官文先行傳旨嘉獎俟立有戰功卽行破格獎勵揔
逆因北路防守綦嚴漸向東南退竄官文派令張曜宋慶兩軍駐
紮北河暫緩拔營一面出省督師探蹤進勦布置尙稱穩妥卽著
照該署督所擬迅速辦理賊情狡詐百出設或誘兵南追伺隙繞
竄北路亦不可不豫爲之防官文旣令陳國瑞會同張曜等軍固
守北路卽著傳知該侍衛等嚴密扼守以固北路藩籬如賊果南
竄北路稍鬆仍當飭令陳國瑞等奮力追勦其余承恩春壽等各
隊卽由該署督統帶出省進勦劉松山郭寶昌兩軍見已拔赴省
南卽著檄飭向東南追勦實力進擊毋稍鬆勁其方長華程文炳

等軍仍著官文催提迎頭截擊以厚兵力並著飛咨左宗棠李鴻章李鶴年等豫爲防勦頃據丁寶楨奏督軍行抵任邱當經諭令該撫由雄縣向安肅保定一帶會合進勦此時賊旣南竄自應改道前進著丁寶楨督飭各軍會合崇厚所派防兵相機迎勦楊飛熊一軍由臨清北來並著丁寶楨飭令探賊所向迎頭夾擊以期各路兜勦就地殄除崇厚亦當飭令陳濟清等軍會同東軍聯絡前進遇賊卽擊官文摺著鈔給丁寶楨崇厚閱看將此由六百里加緊各諭令知之○丁卯諭軍機大臣等李鶴年奏督兵馳抵磁州並借撥火藥等項籌備糧餉各摺片捻匪見由保定東南竄遁北路官兵雲集官文卽日出省督兵追勦丁寶楨亦率東省援兵由雄縣向西南迎擊並與駐防河間之天津洋槍練軍礮隊等會合前進該逆被兵壓擊難保不回向順廣一帶奔竄李鶴年見已

帶兵馳抵磁州著卽在該處駐紮設遇該逆竄至卽可迎頭截剿與直隸追軍互相夾擊迅速殄除河北一帶鎮撫事宜仍著李鶴年就近兼顧張曜宋慶兩軍見在暫紮涿州防衛近畿兼顧易州門戶昨已諭令官文接濟張曜宋慶等軍銀米並令崇厚撥解銀米接濟丁寶楨營軍需著官文崇厚仍遵前諭妥爲籌辦李鶴年所請令州縣採買米麪馬草豫備豫軍過境應用章程並撥車接運護送解營等語均著官文飭令直隸各地方官安速照辦原片著鈔給官文崇厚閱看張曜宋慶兩軍所需細洋火藥並大小銅帽均著崇厚酌量速撥解赴該營本日復據彭祖賢奏請協濟畿輔官軍餉銀一摺除京營派出各路防兵已由神機營籌撥款項外所有劉松山郭寶昌喜昌張曜宋慶等軍均著由官文籌撥餉項分資接濟並著戶部撥銀二十萬兩解交官文覈實應用其丁

寶楨督帶各軍仍由崇厚籌款撥解均毋遲誤以利師行將此由
六百里各諭令知之○戊辰李鴻章奏臣軍自入東剿捻以來倖
立寸功生擒巨獠殄平餘匪年底始克蒞事劉銘傳善慶溫德勒
克西於十二月二十五六等日分起馳回邳州灘上老營潘鼎新
郭松林楊鼎勳諸軍於十二月二十九三十日正月初二初三等
日先後回至濟甯老營解甲稍息臣親加拊視各軍疲憊不堪劉
銘傳三年轉戰勞苦尤甚積受寒溼瘡癰偏體不能乘騎臣因該
提督素資得力屬其始終奮勉毋得偷安而目擊狼狽情形實深
矜憫疊奉諭旨催劉銘傳善慶等迅赴河北進剿臣卽嚴飭各營
趕緊汰去病弱添補缺額製辦衣履整備鞍馬不准刻延向來游
擊之師疲勞已甚須休養整練兩三月然後可用今尙未逾兩旬
也忽奉諭旨賊勢深入畿疆臣恨不奮飛馳援稍紓君父之急

除劉銘傳患病屬實已乞恩稍予養息暫難成行外潘鼎新鼎字全軍並善慶溫德勒克西馬隊已於正月十六日拔營飭令兼程由東阿德景進發唐仁廉馬勇於十八日跟蹤北上郭松林楊鼎勳武毅勳字等營亦陸續進發臣俟周盛波所部由徐州調到擬於二十日親督啟行由東入直查勦捻非馬步大隊不能得力直境地勢平曠尤須用眾臣軍強弩之末遷地弗良事機所值敢稍推諉但冀沿途地方官能爲豫備糧草俾無缺乏必當視賊所向繞由東北向西南攔勦聯絡諸軍共維大局上諭軍機大臣等見在捻蹤趨向博野安平北路較鬆李鴻章所派各軍行抵景德一帶即可探賊所向迎頭截擊一鼓殄除所需軍糧芻料前已諭知官文飭屬妥辦卽著該大臣咨商官文隨時接濟毋致缺乏丁寶楨探知賊蹤南竄卽由固安折回雄縣相機進勦甚合機宜著

卽督兵南向以便聯絡諸軍四面夾擊其楊飛熊一軍卽照所請飭令移紮景州以杜賊竄衡武棗清等處王正起一軍駐紮臨清以固東省門戶所需軍糧等項俱著官文崇厚等隨時撥給毋稍延誤陳濟清所部兵勇著崇厚飭令隨同東軍迎勦力遏賊氛所有津防事宜並著督率春霖等妥爲辦理不得稍有疏虞左宗棠計已行抵井陘本日已諭令在井獲一帶扼紮以杜賊竄晉省之路皖省程文炳等軍計應早抵直境著官文迅速迎提以便會合諸軍協力兜勦並著英翰吳坤修飛催當此大兵雲集必可聚而殲旃該大臣督撫等務當激勵將士迅奏膚功其近日賊情並劉松山等軍有無接仗情形著官文確探賊情隨時具奏以慰廑繫將此由六百里諭知官文李鴻章丁寶楨崇厚英翰並傳諭吳坤修知之○諭前據左宗棠奏稱行抵介休由固關取道赴直當因

賊蹤北擾諭令迅速前來見在賊已由安平祁州南竄北路情形較鬆劉松山喜昌等軍跟蹤追剿甚爲出力丁寶楨亦督兵馳抵雄縣兵力已厚足敷剿辦恐該逆聞風回竄晉省平遼等處仍應嚴防左宗棠計程當可行抵井陘卽著在井陘獲鹿一帶扼要駐紮杜賊入晉之路並知會趙長齡派兵於晉東各隘口嚴密布置儻有賊蹤竄近卽可整軍以待痛加剿洗將此由六百里諭令知之○諭桂成奏擊退邊外竄匪並邊內添兵協防一摺據稱蒙古伊克布棟等處地方賊匪經官兵先後截擊漸次退回邊內惟花定等處匪徒經副都統金順擊剿東趨榆林神木一帶晉省保德河曲與榆屬僅隔一河當此冰橋凝結之時自應添撥勁軍以防偷渡著德勒克多爾濟桂成卽督飭官軍於沿邊沿河加意防堵並遵前旨傳知貝子巴達爾琥札那格爾第等督飭蒙古官兵實

力堵遏毋任匪蹤闖入是爲至要將此由六百里各諭令知之○
己巳諭軍機大臣等恩承奏到防布置情形暨擬仍駐涿州各摺
片捻股雖向東南竄逸惟賊騎飄忽近畿一帶尤應嚴防以杜回
竄易州情形較鬆王亮業已馳抵該處足資防守恩承著暫緩前
赴易州俟涿固等處防務布置周密偵探賊蹤南竄日遠再行前
往所稱調撥達明阿等隊分投防剿之處著卽相機妥爲籌畫仍
隨時呈報神機營酌度辦理將此由四百里諭令知之○諭蘇鳳
文奏官軍疊勝苗匪見籌追剿一摺貴州九阡苗匪竄擾融縣之
長安鎮敗走懷遠境內復勾結土匪窺伺龍勝等邑及分屯草頭
坪一帶地方副將刁經明等設計攻擊並將三元寨等處擒平官
軍乘勝窮追餘匪由銅盤山遁向西江而去此次苗匪侵軼粵疆
疊經官軍追殺其勢漸衰惟西江一帶與黔省永從等縣苗境相

連非大軍繼進不能埽穴擒渠著蘇鳳文嚴檄刁經明等各率所部跟蹤追剿以期悉數殲除仍一面飭令各該地方官激勵鄉團嚴搜土匪迅清邊患其疊竄南丹土州之翁昂等處苗匪並著該撫督飭何元鳳將邊防妥爲布置相機剿擊毋得稍涉疏虞將此由四百里諭令知之○革職畱任山西巡撫趙長齡奏竄豫捻股闖入彰德晉省東北邊防緊要擬卽日親赴潞安督防得旨捻蹤早竄直境該撫何以尙未知悉殊屬糊塗仍著懷遵前旨將直晉毗連各要隘妥爲防範儻再有疏失必將該撫從重治罪○予甘肅陣亡遊擊常德等祭葬世職○辛未諭內閣馮子材奏粵西軍務疲玩請嚴申紀律等語廣西南太泗鎮等府屬股匪林立屢經官軍進剿遷延日久未能一律肅清皆由帶兵各員升玩法縱賊糜餉殃民種種挾制情形殊堪痛恨一省如此恐他省亦所不免

若不申明軍律何以肅法紀而勵戎行嗣後各路統兵大臣暨用兵各省分督撫務當力加整頓正已率屬令在必行遇有軍營帶兵之員失機債事貪鄙玩誤者文官四五品武職三品以上各員卽行嚴參懲辦其文員六品以下武弁四品以下卽行奏明於軍前正法以期迅掃賊氛拯民水火毋得視爲具文致干重咎將此通諭知之○諭軍機大臣等官文奏捻逆竄踞祁州漸趨蠡縣籌辦情形並豫備援軍糧米各摺片英翰奏皖軍啟程日期請飭沿途接濟軍需並歸官文調度覆陳降眾情形各摺片逆匪竄陷祁州尙在該州境內盤踞並漸向蠡縣東南肆擾官文見飭劉松山等軍緊躡賊後向南壓剿而令張曜宋慶兩軍分由容城北河向南移紮已到大汲店一帶擬繞由南路轉向西北與劉松山郭寶昌等軍會合夾擊布置尙屬周妥見在東北一路已有丁寶楨並

陳濟清等所統天津洋槍等隊兵力較厚且匪蹤既在祁縣一帶
停留並未紛竄正可乘此機會會合各軍一鼓殲除卽著官文飭
令劉松山等並豫營各軍迅速合剿官文亦卽督率春壽富和余
承恩等各隊奮勇進發剋期並舉陳國瑞所統之隊卽令作爲遊
擊之師往來策應並著丁寶楨約令陳濟清等軍由東北兩面迎
頭兜擊以剿爲防毋稍延緩各路大兵雲集若不乘此聲威聚而
殲旃以致匪徒他竄必又成尾追之勢該將領中如有遷延觀望
貽誤事機者卽著官文嚴參治罪如果殲擒巨魁盡殄醜類亦必
榮邀懋賞至各軍營糧草著官文飭令地方州縣剋日辦齊准其
作正開銷如有貽誤卽行嚴參懲辦並著官文崇厚速將洋米轉
運各處以備李鴻章等軍營接濟英翰所派程文炳一軍已於初
十日由東阿渡黃著卽歸官文節制調遣並著迅速迎提北上探

賊所向迎頭力勦如有遲延觀望卽由官文嚴參所需軍火糧餉並由官文就近接濟其方長華一軍本由豫省渡河著官文英翰飛飭方長華牛師韓兩軍均在黃河南岸扼要駐紮以防賊匪南竄所統降眾英翰當飭令該統將等妥爲駕馭毋任滋事李鶴年見駐磁州著遵奉前諭遇賊南竄順廣一帶卽與直境追軍會合夾擊毋任竄逸他處李鴻章見已定期北上著卽督率各營迅速馳赴直境合力勦辦毋稍延誤將此由六百里各諭令知之○英翰奏擒首李允業經遵旨正法牛遂旣蒙恩旨寬容見將其暫畱軍前責令立功贖罪如進戰不力仍當立卽正法以期弭患無形任三應卽係任三厥據降眾僉供係於揚州渡河時爲官軍偏擊淹斃尙屬可信臣仍通飭皖境所屬地方官一體嚴密訪查毋任漏網其餘降眾已選挑入伍分飭諸將妥爲駕馭半月來畱心察

看均尙妥協臣仍隨時畱心辦理不敢稍涉大意致貽後患報聞
○壬申諭軍機大臣等英翰奏帶兵馳赴汴梁請旨入衛畿疆一
摺英翰見催吳坤修前赴潁州接署撫篆一面親督英山等軍先
赴汴梁請旨北上並令牛師韓等抽撥馬隊二千二百人趲程赴
援具見勇於任事奮勉可嘉賊匪見在折竄祁州蠡縣一帶著英
翰統率牛師韓方長華等軍暫紮黃河以南如遇該逆回竄豫邊
卽統帶所部實力進剿所收降眾駕馭殊難畿輔重地關繫尤爲
緊要英翰如渡河剿匪務當慎選可靠之軍妥籌調度不可稍涉
大意並檄飭程文炳一軍迅由河間等處會合諸軍向南壓剿英
翰見已啟程著吳坤修迅赴潁州接署撫篆所有皖省善後及征
軍糧餉一切事宜卽著妥爲辦理見聞該捻擾及深州一帶係由
東南竄逸昨據官文奏匪陷祁州並擾蠡縣是賊蹤仍趨北路見

在該逆究逸何處祁州之賊是否盡趨蠡縣著官文查明見在賊情隨時具奏以慰廛繫左宗棠當仍遵前旨迅駐井獲之間扼賊入晉之路捻逆如有南竄消息著李鶴年檄飭各營會同英翰所部迎頭截擊以圖聚殲捻逆逼近畿疆丁寶楨英翰等深明大義迅統援師北上各路追剿之軍亦俱雲集若不乘此激勵將弁一鼓擒渠致賊紛竄他處則匪勢既多蔓延攻剿之師亦不能如此厚集且此時冰雪凝沍野無青草賊無所掠其勢易窮著官文會商各該督撫合力同心迅籌滅賊以副委任將此由六百里諭知官文左宗棠英翰李鶴年並傳諭吳坤修知之○飭福建浙江江西各撥銀一萬兩專濟皖軍○予直隸殉難知州胡源祭葬世職○癸酉諭軍機大臣等昨因援兵四集機不可失諭令官文會商各督撫等迅籌滅賊之策見聞饒陽失守各軍觀望不前意圖蹶

賊出境不使犯及北路雖爲慎重京畿起見而頓兵不進任賊肆擾上年畿南水旱疊乘飢民眾多儻被裹脅則賊勢愈張剿辦更形棘手況賊匪出境後難保其不再回竄是時追剿各軍必致又落賊後見在北路已有玉亮各軍分段嚴防並令恩承總統其事此外又有托雲定安鄭魁士諸軍分紮通州盧溝橋等處各專責守恩承定安鄭魁士著卽督率各軍妥爲防範左宗棠駐紮井獲之交李鶴年駐紮磁州丁寶楨程文炳兩軍專爲東北兩面屏蔽儻遇大股逆匪衝突著各該督撫嚴飭各軍實力堵禦不使一匪竄越如止分股撲犯卽一面嚴防一面痛加剿洗毋使漏網所有劉松山郭寶昌張曜宋慶陳國瑞等軍前諭均歸官文調遣卽著該督督嚴飭各軍專取犄角之勢面面進攻分爲數隊逐日更番疊戰春壽等馬隊於北面前進專事包鈔追逐並責令余承恩等

軍乘夜潛劫使賊日無所掠夜不得息此數軍統領素稱果勇善戰著該署督專責以攻剿之事毋以防務牽掣俾得盡力殺賊卽有零股賊匪紛竄自有各路防兵隨地剿滅儻各該將官不能同心剿賊卽著官文嚴參治罪該署督務當申明賞罰嚴覈功過不可稍有偏向使諸將允服自能奮興鼓舞共圖立功該署督如一昧因循徒知驅賊出境是不以不能滅賊爲恥尙得爲克盡厥職耶李鴻章於剿捻情形最爲諳悉見在行抵何處卽著探明賊蹤迎頭痛剿其郭松林等軍並著趙催前進以厚兵力前諭官文等如有擒獲張逆者卽照摺獲任柱之案給賞其願給官職者卽加等優獎著官文等再行出示曉諭軍民使各奮勉崇厚卽飭陳濟清隨同東軍嚴防並於天津等處妥爲防堵以壯聲勢英翰卽著於河南北相機扼紮以杜逆賊回竄之路毋稍疏虞正在寄諭間

據官文馳奏捻逆由蠡縣肅甯竄至饒陽邊馬已及獻縣程文炳兼程趕到其大隊正抵獻縣各等語賊蹤原無定向但任其所往何日可以殄滅且邢州饒陽先後失陷何以並無官軍應援任賊蹂躪殊堪痛恨見在程文炳既抵獻縣卽著官文飭令迎頭痛剿並著丁寶楨派軍會擊以剿爲防其劉松山等軍卽由官文飭令由西北面緊躡賊後合力剿除北路固宜嚴防而各處大軍雲集防剿自有專責該署督不得以力顧北面爲辭任賊縱橫奔突儻各軍觀望不前聽賊遠颺惟官文等是問饒陽失陷知縣劉嘉祥因公赴省是否爲賊所阻其倉庫監獄暨同城文武下落均著官文查明具奏將此由六百里諭知官文李鴻章左宗棠英翰李鶴年丁寶楨崇厚恩承定安並傳諭鄭魁士知之○諭成祿奏官軍圍逼肅州逆勢漸形解散一摺肅州在城逆黨見官軍圍攻日緊

乘夜潛逃經馬天祥等軍追至惠回堡地方殺賊不少城中踞逆因外來逆股勢多離散負隅抗守此次官軍圍逼肅城逃匪復經追殺逆勢漸衰成祿仍當檄飭王仁和等設法環攻迅圖規復肅州一城頓兵日久屢有旨令成祿將該城迅拔整隊出關該提督非以賊情窮蹙爲辭卽以圍逼日緊自解關外情形置之不顧該提督豈復有天良耶前有旨令楊占鼐署理甘肅提督著穆圖善卽飭該署提督趕緊馳赴肅州接辦西路軍務以便成祿剋期啟程毋稍延緩成祿俟楊占鼐到時卽著統帶原部出關勦辦哈密等處賊匪毋庸辦理肅州軍務儻再藉詞遷延定將該提督從重治罪決不寬貸將此由五百里各諭令知之○諭劉嶽昭奏滇省變亂廢弛情形派軍赴援平遠肅清白泥壘苗匪投誠各摺片滇省羅次楚雄等城先後被陷賊勢披猖亟應力籌勦辦著劉嶽昭

抽調遵義等處防兵遴選得力將領統帶迅速赴滇相機進剿劉
嶽昭將黔省軍事剋期料理完竣卽進駐曲靖通籌全局妥爲布
置該撫所陳用兵籌餉內患西征四端卽著振刷精神實心籌辦
總期實事求是毋得徒託空言滇省日形糜爛亟應大員前往以
資鎮撫著張凱嵩星速馳赴新任與劉嶽昭將地方軍務各事宜
會商妥辦毋再遷延觀望致干罪戾劉嶽昭移師滇境所有黔省
剿匪機宜著曾璧光檄飭各軍妥爲調度務將苗教各匪節節掃
蕩以期次第廓清白泥壘苗匪求撫是否可靠著劉嶽昭會合曾
璧光督飭屬員詳察真僞妥爲辦理毋爲該逆所紿將此由六百
里各諭令知之○大學士賈楨因病請解職命以太子太保大學
士致仕賞食全俸○甲戌諭軍機大臣等崇厚奏賊由肅甯南竄
擬籌合圍方略並籌撥洋米接濟兵食一摺賊匪邊馬竄及肅甯

因陳濟清等統帶槍隊練軍由高陽任邱一帶進剿折向南奔已入武強之小範等境崇厚擬令陝軍由正定扼守滹沱上游兼顧獲鹿入晉門戶晉軍扼守太行各山口直軍扼守滹沱下游屯兵深冀之間淮軍固守衡水景州挑濠扼紮東豫兩軍分守衛漳兩河爲四面進攻之計惟直省地勢平行廣闊無險可扼各軍四處分布相距太遠轉令賊騎得以伺隙狂竄且劉松山郭寶昌等軍業經由北面追賊而南張曜宋慶等軍已由滿城而東丁寶楨已由雄縣進紮任邱程文炳一軍昨據官文奏稱已抵獻縣正可與賊邊馬相遇由此西向進剿此時若再將諸軍紛紛更調轉延時日更慮賊匪得以乘隙四竄襄魯日眾益覺滋蔓難圖著官文丁寶楨崇厚仍遵昨日諭旨飭令諸軍奮勇進剿務當乘此援軍厚集之時迅速剿擊但能連獲勝仗痛加懲創以後便可節節得手

不難剋期殄除潘鼎新善慶溫德勒克西等軍計期已可由德州一帶直入唐仁廉郭松林楊鼎勳並李鴻章所帶之周盛波等軍當亦陸續可到著官文李鴻章斟酌情形檄飭淮軍由景德二州橫向西出迎頭兜剿毋令賊匪回竄順廣大名並分撥淮軍遏截臨清迤北以防賊匪竄至臨清東昌等處濮范開長一帶久爲匪藪母任此股捻逆竄往致多勾結剿辦更難得手左宗棠仍遵前旨駐軍井陘之交趙長齡派兵分防太行各山路隘口遏賊竄晉之路李鶴年嚴防磁州一帶毋令賊蹤回竄豫境英翰督率皖軍嚴扼黃河南北兩岸與李鶴年聯絡聲勢互相截剿天津所存之洋米並起卸未敗之洋米均著崇厚先行撥運直境各處接濟南軍食用毋稍遲誤將此由六百里各諭令知之○廣江西建昌府學額一名江蘇金壇縣九名湖北應城二名○乙亥左宗棠奏

於正月二十二日行抵獲鹿據郭寶昌稟擒獲賊目謝應俊訊供張逆總愚有竄犯天津之意如不能竄則挑畱悍賊輕騎馳突賊供不爲無因請飭下崇厚丁寶楨於河間天津嚴爲扼截臣已飭劉松山郭寶昌確偵賊蹤從容南下臣之此行原求力衛畿甸稍贖縱賊入晉入直之罪見在賊蹤漸南亦當視賊所向誓殄此賊以盡愚忱劉松山郭寶昌喜昌等既經官文調令跟蹤漸俟賊遠出北路然後進擊或前途另有大軍前來彼此知會合力痛剿今臣既抵獲鹿自未可拘守一隅坐待賊至惟有力顧晉省東路由西而東督率所部遇賊卽擊以期迅殄狂氛臣軍兵力已厚所有節次欽奉諭旨飭臣節制已到未到各軍應請旨仍飭各原省督撫臣及直省督臣調遣以免紛紜至晉省東路防軍已嫌單薄而南路垣曲封門口要隘僅撥兵三百餘名扼守萬一賊由河北

竄走豫軍已調赴保定北路勢難趕到賊前設由懷慶闖入則晉省腹地又將處處糜爛可否飭下山西撫臣轉飭臬司陳湜如河冰漸釋應仍酌帶所部勇丁分布防守以期周密丁寶楨奏臣初得賊竄博安之信當飭已革總兵王心安等帶隊於正月十八日先行取道雄縣河間探蹤追剿臣十九日亦督隊繼進二十四日連接王心安稟報該軍於十八日兼程行抵雄縣十九日抵任邱探知賊眾大股在肅甯東西二關並張岡村一帶盤踞二十日督隊由河間取道進剿行抵河間西南二十里探知賊又由肅甯竄撲饒陽縣城王心安卽於是夜拔隊行過肅甯十餘里卽見該匪邊馬亂竄副將宋延德帶馬隊沿途趕殺王心安自督步勇七營分三路而進未刻行距饒陽三十餘里岳家莊地方探悉前路三里許之魏村有大股盤踞王心安卽令宋延德帶馬隊巡哨自率

七營員弁分路直前猛撲時該逆正接搶當舖各勇呐喊衝入槍矛並擊該匪衝出千餘騎拌死拒敵各勇縱橫截殺斃悍賊百數十人匪勢不支敗向西南狂奔王心安以兩營入村接殺自帶劉志和等追剿十二里沿途斃賊多名奪獲賊館十四處是晚探悉該匪盡踞饒陽城內及附郭關廂王心安卽傳令四鼓進攻縣城二十二日由尹村行距縣城十餘里該匪出馬賊三四人列仗拒敵宋延德帶馬隊奮力猛衝王心安將步勇結爲圓陣繼進馬賊左右環撲各隊以槍礮連環互擊斃賊約二百餘人賊向縣城逃遁王心安督隊追及城下率勇登城賊越境竄逃各勇進城將餘賊追殺殆盡卽將縣城收復王心安入城安撫難民卽派各隊出城暫歇復行跟追旋探悉該匪仍踞菜園地方王心安令各勇追擊斃數十人賊倉皇奔竄復將菜園奪回王心安乘勝分隊

包鈔該逆回馬衝突各隊結陣禦敵屹不少動該匪下馬格鬪又另出馬賊四面橫衝各勇回環接仗斃賊甚眾王三元劉志和金成德三營復追出二十餘里天色已暮迷入村莊該逆以馬賊三四千圍之各勇整隊力戰斃賊約二三百人賊捨命猛撲直至更餘參將金成德守備劉家興力竭陣亡三營勇丁計傷亡衝散約三四百人三更時方至菜園會集二十三日黎明賊復麇集團攻我軍據柵力戰至更餘賊始敗退王心安乘夜親督各營襲剿賊營各勇大呼殺入該匪驚亂直向西南竄逃王心安督隊追壓四十餘里見在賊已盡向西南遠遁等情此次王心安以三千餘人追剿兩萬餘賊孤軍深入百餘里收復縣城後鏖戰至兩晝夜士卒皆忍飢血戰嗣復乘夜襲擊殺獲甚眾見在該軍仍擬追剿臣令其暫爲養息飭莫組紳一軍前進該軍再行續發臣到河間後

本擬督隊向饒陽前行因東北一路僅臣一軍恐賊復乘虛北竄刻下該匪疊經大創盡向西南遠竄北路稍鬆見擬調回楊飛熊一軍至河間扼紮臣暫駐調度俟北面穩固再行督隊進剿王心安剿賊奮勉可否賞還該革鎮原官頂翎陣亡之參將金成德守備劉家興應請飭部從優議卹其餘復城出力並陣亡文武員弁兵勇容臣查明分別奏請獎卹上諭軍機大臣等捻逆竄向饒陽丁寶楨派令王心安帶隊進剿收復縣城鏖戰兩晝夜將賊匪擊敗該逆見向西南竄遁丁寶楨由山東督軍北上首先奮勇派兵擊賊獲勝保衛近畿深堪嘉尚著卽整頓師旅相機追剿毋稍鬆勁直隸前敵各軍如劉松山郭寶昌喜昌張曜宋慶程文炳等所部均距賊蹤不遠何以並未會合進攻僅止王心安三千人孤軍深入天津槍礮練軍與東軍同在一路何以亦不會同前進是

否有推諉觀望情事著官文崇厚查明具奏並著催令各軍乘勢迅速追剿以期一鼓殄除見在各路援軍雲集深慮進止不齊未能協力同心共圖埽蕩左宗棠見抵直境所有前敵追剿各軍均著歸該大臣總統以一號令賊騎飄忽靡常見在追賊各軍並著該大臣飭令各將領相機奮剿不必往返請令拘泥稽延致誤事機左宗棠未經接辦之先所有剿賊事宜仍著責成官文遵照前日諭旨責令劉松山郭寶昌喜昌張曜宋慶春壽余承恩陳國瑞程文炳等專取犄角之勢面面進攻各分隊伍更番疊戰晝夜剿襲以免耽延時日至東北兩路仍責成官文丁寶楨崇厚調度各軍嚴行防剿東南兩路責成李鴻章嚴密堵禦其派出進剿馬步各隊入直境後亦歸左宗棠調遣以一事權西南一路責成李鶴年於直豫交界處所實力扼截英翰督率所部仍在河南北擇要

駐紮與李鶴年聯絡聲勢以上各路防務專責成各該督撫如賊由何路竄出卽惟何路官軍是問其前敵進剿各軍如有觀望遷延不遵調度者左宗棠亦當據實參奏毋得徇隱干咎各省官兵各有本省應領之餉儻遇缺乏著官文崇厚隨時接濟河南風門口爲入山西垣曲要口據左宗棠奏防兵單薄如賊由河北回竄晉省難資得力著趙長齡另派得力將弁扼紮以固晉省門戶其吉州等處河防仍著陳湜在該處辦理左宗棠另片奏請撥坐糧廳漕米轉運保定等語各路援軍前已令戶部撥銀二十萬兩交官文分辦軍需並令崇厚由天津撥解洋米分運直境各處接濟儻有不敷再由官文崇厚酌量奏請撥解倉場所存米石以濟軍食將此由六百里各諭令知之○諭趙長齡奏查明捻逆搶渡入晉失事殉難各員分別辦理暨請將總兵知府等官懲辦各摺片

擒逆竄入晉疆在事文武各員戰守均不得力該撫所奏與賊接
仗及失守收復各情是否確實署吉州知州余澤鄉甯縣知縣陳
魯典史劉掄英有無聞警潛逃飾詞捏報之處著鄭敦謹確切查
明從嚴參辦至參將趙融知府陳膺福所帶勇丁既有搶奪財物
陵辱婦女等事經趙長齡飭查何以陳膺福不將滋事之勇按名
交出是其庇縱勇丁已可概見著鄭敦謹卽將趙融陳膺福縱容
勇丁確情查明據實參奏仍飭陳膺福將滋事之勇交出照例懲
辦已革總兵陳必友帶隊能否得力並於賊匪搶渡時有無貽誤
重情著一併查參原摺片均著鈔給閱看鄭敦謹計期早已行抵
晉省何以久無奏報殊堪詫異著卽將該省布置防務情形及諭
令交查各件迅速查明據實具奏毋稍徇隱將此諭令知之○命
欽差大臣左宗棠總統直隸各路官軍○以剿擒獲勝賞還已革

總兵官王心安原官頂翎○予山西陣亡副將舒再元等祭葬世職○修湖北安陸府屬隄工○丙子諭軍機大臣等官文奏剿賊獲勝並賊蹤南竄情形李鶴年奏遵查宋慶張曜兩軍遲誤各情並請飭豫軍不可分剿及擬紮安陽調度各摺片東軍剿擒獲勝情形昨據丁寶楨具奏已明降諭旨宣示此次擒逆在直任意肆擾劉松山等軍既未能大有懲創而陳國瑞宋慶張曜尤未能奮力痛剿殊負期望見在賊竄武強邊馬已及衡水北路布置嚴密不慮該逆回竄著官文懷遵疊次諭旨嚴飭各將士痛加追剿不得再行觀望致干重咎賊蹤南趨左宗棠正可督兵迎擊該大臣以滅賊自誓諒不肯稍涉延緩著卽相機前進指示各軍同心協剿迅圖殄滅李鶴年前已摘頂示懲所請治罪之處著毋庸置議宋慶張曜兩軍兵力未厚可合而不可分亦係實情見在該總兵

等仍合在一處進剿惟未能奮勉追擊著左宗棠隨時訓飭俾知儆惕李鶴年因磁州非用兵之地擬改紮安陽卽著該撫相度辦理所有直隸交界處所卽責成李鶴年嚴爲防堵一面知照英翰合兵堵剿丁寶楨著仍遵前旨力顧東北兩面並嚴防該逆竄入東省致令追軍盡落賊後本日據侍郎毛昶熙奏直隸民鮮蓋藏軍食仍絀若四五月以前不克埽蕩則耕穫失時民困思亂師老不振請飭各軍迅籌剿擊等語所慮不爲無見著左宗棠官文申明賞罰用作士氣毋待朝廷之日夕訓誨也將此由六百里各諭令知之○麒慶請酌撤朝陽征兵以逸匪彌勒僧格白凌阿未獲不許○予直隸陣亡副將郭運連祭葬世職○丁丑諭軍機大臣等富明阿等奏訪拏鄰境巨盜首從各犯請旨辦理一摺逸匪白凌阿及夥匪焦西平卽焦振東逃至吉林之弓棚子地方經佐領

杜隆阿派兵拏獲該犯等罪惡貫盈自應立予駢誅以昭炯戒白
凌阿一犯屢經官兵拏獲乘間脫逃其真偽殊難辨別茲據該將
車等所奏各情諒必審訊明確儻此次所獲非真將來別經發覺
必惟富明阿是問見在白凌阿雖已就獲其同夥匪犯藏匿於吉
林各邊者尙復不少仍著富明阿督飭緝匪員弁協同熱河等處
所派各員隨時按捕以期淨絕根株毋稍疏懈將此諭令知之○
戊寅諭軍機大臣等官文奏捻逆乘間北竄官軍繞截情形崇厚
奏賊匪覬覦天津調兵回防各一摺賊股在饒陽被官軍擊敗遁
至安平復由安平折向祁定北趨竄至省南三五十里地方見在
劉松山郭寶昌喜昌並張曜宋慶等軍均在北面扼紮程文炳軍
行近省城潘鼎新軍已到獻縣左宗棠相距較遠官文職任封圻
責無旁貸所有見到各軍仍著官文嚴飭將弁速行會合夾剿務

期痛挫兇鋒以副委任春壽所統馬隊並由易州調赴前敵之黑龍江馬隊及余承恩陳國瑞等所帶馬步各隊均在保定官文當乘此兵力厚集督令出剿北路固有玉亮恩承等軍加意嚴防而匪勢如果北竄亦可令春壽等迎頭扼截該署督諒不壘擁兵自衛坐失事機其東北一路卽著丁寶楨督率東軍迅由西面前進會合保定諸軍力殄狂氛並著兼顧北路毋令賊蹤乘隙北竄賊股旣已南竄武強衡水何以倏又北折擾及保定是否係另股北趨牽掣北路官軍而大股另圖南竄抑係全股均行北犯著官文查明具奏並著官文丁寶楨確探賊情相機會剿轉瞬春融凍釋閭閻亟當乘時播種若不將賊匪迅速殄除則民食維艱益致流離失所畿疆重地尤屬可虞該署督等諒早見及左宗棠旣由獲鹿前進務當視賊所向迎頭截擊以顧西南一路賊匪旣有竄撲

天津之意崇厚當妥籌布置實力嚴防所有前經調出之槍隊練軍卽著崇厚飭令陳濟清統帶回紮靜海一帶力顧東南將此由六百里各諭令知之○是月緩徵直隸滄州等六十二州縣被水被旱被雹被風被擾新舊額賦租課暨民借倉穀山東濟甯等五十七州縣德州等四衛東平所屯莊永阜等三場被水被旱被潮被風被蟲被擾本年上忙額賦暨雜課竈課